

**Pemimpin Perniagaan Dunia Hadiri Persidangan Forbes 2011 Di Kuala Lumpur
Bernama
22 Ogos 2011**

KUALA LUMPUR, 22 Ogos (Bernama)-- Seramai kira-kira 400 pemimpin, termasuk pemimpin perniagaan dunia, akan berhimpun di Kuala Lumpur untuk menghadiri Persidangan CEO Global Forbes ke-11 dari 12 hingga 14 Sept.

Persidangan tahun ini akan memberi tumpuan terhadap usaha menangani unjuran masa depan ekonomi yang kini tidak menentu. Ia juga akan meneliti risiko dan peluang yang muncul daripada ekonomi dunia yang rapuh ini.

Persidangan itu dianjurkan dengan usaha sama kerajaan Malaysia, Julius Baer, EMR Corporation, Tata Consultancy Services, Corporate Executive Board, ADS Securities, Steinway Lyngdorf, Royal Falcon Fleet, Research In Motion, FICOFI dan Weber Shandwick.

Dalam satu kenyataan hari ini, penganjur berkata tema persidangan kali ini ialah "Di Persimpangan".

Ia juga bakal menyaksikan penyertaan pemimpin politik utama Malaysia, termasuk Perdana Menteri Datuk Seri Najib Tun Razak dan Timbalan Perdana Menteri Tan Sri Muhyiddin Yassin.

"Pada "persimpangan" dagangan global, Malaysia merupakan destinasi ideal untuk mengenal pasti peluang-peluang pelaburan dan kerjasama ekonomi yang akan membantu mengembalikan pemulihan ekonomi dalam jajarannya," kata Menteri Perdagangan Antarabangsa dan Industri Datuk Seri Mustapa Mohamed dalam satu kenyataan.

Selain pemimpin politik, individu dari dunia perniagaan, tempatan dan antarabangsa, juga turut hadir.

Ia termasuk Pengarah Urusan Khazanah Nasional Datuk Seri Nazir Razak, Ketua Pegawai Eksekutif Kumpulan AirAsia Tan Sri Tony Fernandes dan Naib Pengerusi Tata Consultancy Services S. Ramadorai.

--BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=609537>